

Šestoaprilska nagrada grada Sarajeva 2002. godine

„Živjeti u Sarajevu, to je već nagrada“

Na svečanoj sjednici Gradskog vijeća Sarajeva koja je održana 06.04.2002. godine u hotelu Holidej Inn, dodijeljene su Šestoaprilske nagrade zaslužnim pojedincima, grupama i kolektivima.

Laureati pojedinačne Šestoaprilske nagrade su Izet Sarajlić, Danis Tanović, Marko Vešović i **Adil Zulfikarpašić**.

Grupnu nagradu su dobili Nijaz Hastor i Nihad Imamović, dok su kolektivne Šestoaprilske nagrade uručene Sportskom društvu invalida "Spid" Sarajevo, Specijalnoj jedinici MUP-a BiH-odredu "Bosna", Međunarodnom teatarskom filmskom festivalu MESS, Hrvatskom kulturnom društvu "Napredak", Središnja uprava Sarajevo, te Srpskom prosvjetnom kulturnom društvu "Prosvjeta". Dobitnicima je nagrade uručio gradonačelnik Sarajeva Muhidin Hamamdžić, a predsjedavajuća Gradskog vijeća Sarajeva Mira Jandrić-Winterhalter je predstavila sve laureate pojedinačno, kao i njihov doprinos gradu Sarajevu.

U ime svih dobitnika Šestoaprilske nagrade, Gradskom vijeću i gradonačelniku se zahvalio književnik Izet Sarajlić.

„Roditi se i umrijeti može svugdje, ali živjeti u Sarajevu, već to je za posao kojim se ja bavim bila ona nagrada o kojoj se može samo sanjati. Vjerujem da slično osjećamo svi mi koje ste danas udostojili ovom nagradom. Upravo zbog toga ona bi za svakog od nas morala da ima poseban značaj. Ne znam Danis, ne znam Zulfikarpašić, ni ostali njeni dobitnici, ali meni lično, mada sam se nadobijao mnogih nagrada, bez ove, na prvom mjestu, bilo bi nekako još teže, kad za to dođe vrijeme, prelaziti u uspomenu“, kazao je Sarajlić, koji je potom odrecitovao i jednu od svojih mnogobrojnih pjesama posvećenih Sarajevu. Iako je Danisu Tanoviću ovo već 43. nagrada, oskarovac nije krio sreću i zadovoljstvo što se našao među njenim dobitnicima.

„Ovo je posebno i meni najdraže priznanje, jer mi ga daje moj grad, moje Sarajevo. Velika mi je čast biti ovdje, među tako velikim i zaslužnim ljudima, jer Šestoaprilska nagrada je još kad sam ja bio mali značila jako puno. Volio bih da ona svima znači onoliko koliko znači meni“, kazao je Danis i naglasio kako će priznanje Grada Sarajeva dobiti posebno mjesto u njegovom stanu, „da ga svako može vidjeti“.

Adil Zulfikarpašić, koji je gradu Sarajevu darovao Bošnjački institut, primajući brojne čestitke za nagradu, kazao je kako je Šestoaprilska nagrada priznanje koje veoma cijeni i koje sa velikim veseljem prima. „Izuzetno mi je drago što sam bio u mogućnosti na svoj način doprinijeti razvoju grada Sarajeva“, naglasio je **Zulfikarpašić**.